

# Poli'a Timoti Ese

## Avonkremin'nea Naneke

---

**1** <sup>1</sup>Nagra Poli'na, Kraisi Jisasi eri'za ne'mo'na Anumza Tzahu ne'ene Kraisi Jisasi humanantenate, emema tvaresigu Rantimofa aveganentoa aposol ne'mona, <sup>2</sup>Timotiga nagri tamage mofavremoka mago tamentinti nehu'mokarega, Anumza Nerafantegati ene Kraisi Jisasi Ranti'mo'a asunku huganteno asurgi'zane, arimpa fruzamo'a kamisigeno kagrane mesie.

### Havige mono hunezmiza vaheku kva hanaza naneke

<sup>3</sup>Masedonia katre'na vunaku nehu'na, nagra tutu hugante'noe, Efesas mani'nenka havi mono huku hanaza nagara, anara osiho hunka nezmasminka, <sup>4</sup>havige hanaza kegu antahi zamige, korapa fore hu'nesia knihe kerera antahiozmiho. Na'ankure ana zamo'a hafra fore huno tmaza osina, Anumza'mofontegati erinaku tamentinti hanaza zana e'origahaze. <sup>5</sup>Hianagi tagrama rempi hune'zmuna zamofa agafa'a, zamesi nezmante'za zamagu'areti agru hu'ne'za, knare zamagu'zamage sareti zamentinti hugahaze. <sup>6</sup>Na'ankure mago'a rempihuzmi vahe'mo'za knare'zana agtere'za hazagre'za nevu'za, zamaza osugazanku havi naneke nehantagaze. <sup>7</sup>Kasege huzmasmi vahe nesampra'zanagi, zamagra ana kema hazanke antahinira osu'ne'za, antahi'none nehu'za zamufa eri mreri'zageno kemo'a nena'a nomne.

<sup>8</sup>Hu'neanagi tagra antahi'none, kasegemo'a knare hu'negeta, ana kasegema Anumzamo hu'nere, amage anteta avariri sunkeno'a knare hugahie. <sup>9</sup>Hagi tagranena antahi'none kasegema tmi'neana fatgozama nehaza vahe'mokizmigire huno ozami'ne, Hagi kasegema ovariri'za ha'nentake nehu'za, Anumzamofa avu'ava nosu'za kumi' nehaza vahe'ene mani otage osu'za, otage huno mani'zanku huhavi'za nehu'za, nezmafano nezamrerano zamahe nefri'za, vahe zamahe nefri'za, <sup>10</sup>monko'za nehza vahe'ene, vemo vene mse'zane, vahe kumzafa nesea vahe'ene, agi'ari vahe'ene, hu'nesia zanteku vahane hu' vahe'ene, knare'za rempi huzmi zanku huhaviza hu vahe'ene, <sup>11</sup>msa'nentake konarari'ane

knare musenke'afi (gospol) asomu'ane Anumzamo, huzamasmio huno huhamprinante'ne.

<sup>12</sup>Krais Jisasi tagri Ramo, hihamu nami'negu muse hunentoe, na'ankure Agra nagri antahi namiteno, erizani'a erigahane huno huhampri nante'ne. <sup>13</sup>Hianagi korapara Anumzamofona nagra azanva ke nehu'na, amage' nentaza vahera zamazeri kore' nehu'na, tusiza hu'na Jisasi agifi amage' nentaza vahera ha' rezmante'noe. Ana hu'noanagi asunku hunante'ne, na'ankure antahi'na ke'na osu'nena namentinti osu'nogu anara hu'noe; <sup>14</sup>Ra Anumzamofa asunku zamo'a agtereno avite'ne, amentintine avesizanemo'a Krais Jisasimpi me'negeta negone. <sup>15</sup>Ama'i tamage nanekegino, hakare'a vahe'mo'za zamentinti hugahaze. Na'ankure Krais Jisasi'a kefoza nehaza vahe zamahokehesigu ama mopafina erami'ne. Ana agu'afina nagra zamagtere'na hakare vahera kefo'zana hu'noe. <sup>16</sup>Ana hu'noanagi, nagriku esera asuntagi nante'ne, nagrite vahe'mo'za avame zana nege'za, Agrite kumi' vahe'mo'za esnagu agazone huno zamega anteno mani'ne, Krais Jisasinte zamagra zamentinti nehu'za, ksefa hu'za mni vavahu nomni'zana erigahaze. <sup>17</sup>Menine maka knafi manivava nehia Kini nera, ofrino, vahe'mo onke, magoke Anumzana, konariri'ane manivava hugahie. Tmage.

<sup>18</sup>Magoke tamentinti nehu'a mofavre Timotiga, ama avompi kre negamua nanekegu, kagesa antahio. Ko'ma mago'mofonku Anumzamofa naneke asmigeno, kagriku huama hu'nea kasnampa kefi hankve tinka Rantimofa ha'pina, knare hunka hara huo. <sup>19</sup>Kmentinti azeri hanavetenenka, kagu kagesareti knare antahintahi huo, na'ankure mago'a vahe'mo'za zamenosige'za zamentintifina atre'za vente (ship) eritagnavaziankna nehaze. <sup>20</sup>Ana agu'afina Haimenasi ene Aleksandake, e'inahu avamera hu'na'e. Ananku hu'na Sata azampi znante'noe, Sata'a kna nezanaminke'ne rempi huteke, Anumzamofa agi'a azanva kea huontesa'e hu'na hu'noe.

### Maka veaku nunamu huzmante'suna naneke

**2** <sup>1</sup>Anumzamofa agihanta vazi'zana pusaza me'ne. Nunamu huta agihanta nevzita, tagrima tvesi'nia zanku antahinegeta, muse hunenteta, maka vahe zamagi erita zamaza hanigu antahige'snune, <sup>2</sup>Kini vaheku'ene maka kva krinerantaza vaheku'ene nunamu huzmante'sune, ana nehnunke'za kva huso'e nehnageta, agzone huta, fruzampi Anumza avu'avate ene fatgo mani'zampi so'e huta magoke'pi manigahune. <sup>3</sup>E'inahu zamo'a Anumza Tzahu ne'mofo (Savior) avufina knare nehigeno musena nehie. <sup>4</sup>Kefo zampinti tahoke he'nea ne'mo, maka vahemo'za tamage naneke antahi'za zamasimu erisazegu avenesie. <sup>5</sup>Na'ankure Anumzana magoke mani'ne. Anumzane, vahe'mota amu'nompina, anazanke huno amu'no nera magoke mani'ne, ana nera Krais Jisasi'e. <sup>6</sup>Tusi'a mizanteti

Agra'a avufga atreteno, maka veara miza seranteno, Anumzamomo huhampri ante'nea kna eri ama hu'ne. <sup>7</sup>Ana zanteku huno nagrira nazeri oti'ne, Anumzamomo mono naneke zamasm'i'nea antahisnagu, nazeri oti'nea aposol ne'mo'na, nagra tamage nehue, havigea nosue. Zamufga tga osu vahe (gentiles) rempi huzminena zamentinti hu'za tamage nanekea antahihogu huama nehue.

<sup>8</sup>E'ina hu'negu nagri'ma nave'nesiana hakare'a kumate vene'nemo'za, ruotage zamazana antesga hu'za nunamuna nehu'za, kevu hu'neza fra vazi'za ke hakare osiho.

#### **A'nemo'za zamavuzmavama hanaza zamomo naneke**

<sup>9</sup>Nagri'ma nave'nesiana, anahu'kna a'nemo'za zamavasese hanafina hugahaze, kukena knare'za hu'za masigahaze, kukena hanazana vahe'mo'za kezmasane hu'zane, zamanu zamazoka hane'zane, kolire trohunenaza avasase zane, hage rimpinti zane (pearl), marerisa kukena osiho. <sup>10</sup>Hu'neanagi Anumzamomo amage' nentonema hanaza a'nemo'za, knare avu'ava nehu'za, ana avu'avateti knare avasese hiaza hu'za hugahaze. <sup>11</sup>A'mo'a akohe'no rempi humisia ke erizafa nehuno, ke amage' anteno, agzone huno manigahie. <sup>12</sup>Hu'neanagi nagra a'nemo'za vene'ne rempi huzmi zankuro, kva mani'zankura navenosie, e'igu agzone hu'za mani'snaze. <sup>13</sup>Na'ankure koteno ve Adamu tro huteno, henka'a ara, Ivina tro hu'ne. <sup>14</sup>Adamuntera revatga zana fore osu'ne, hagi a'momo revatga higeno, kumi'pina traka hu'ne. <sup>15</sup>Hu'neanagi a'nemo'za mofavrema kse nezmante'za, zamentinti nehu'za, ovesinte avesinte nehu'za, mani ruotage hu'za nemni'za, zamagu'ane zamagi'ene, kva hanaza zamo knare mani'za erigahaze.

#### **Mono nonte kva hnaza vahe'ene Dikeni vahe'momo naneke**

**3** <sup>1</sup>Ama'i tamage naneke, iza'o mono kva manigahue hanimo'a, knare eri'zane huno erino. <sup>2</sup>Kvama hania ne'mo'a amanahu hino, hazenke'a omneno, magoke a' anteno, manizama'a kva nehuno, fatgo zanke nehuno, avufa antermino nemnino, nantu antentesia vahe agampu nehuno, agra knare'za rempi huzmi ne' nemnino, <sup>3</sup>hanave rina neno negi oneno, hafra osuno, hagi arimpa fru nehuno, ke hakare osuno, zgogu avesinte'zana atreno. <sup>4</sup>Agra knare huno naga'a kva nehuno, mofavre zga'a zamazeri fatgo hanige'za, knare kante maniho. <sup>5</sup>Hu'neanagi naga'a kvagri so'e nosnimo'a, ina kna huno Anumzamomo mono' nona kegva hugahie? <sup>6</sup>Menima agu'a rukrahe hu'nesnia nera, mono kva ne' manisnie hunka ame'ama hunka azeri o'otio. Agra avufa erisaga nehnigeno Sata'a ana hanifi efreno azeri traka hugahie. <sup>7</sup>Hagi monopi omani megia vahe'mo'za nege'za, knare nere nehnigeno, agra havi avu'avapina uramino Sata krifufina ohegahie.

<sup>8</sup>Dikenima manisia ne'mo'a, anahu kna huno avu'avapina fatgo huno mani'nenno, tare agerura oruno, hanave tintera osuno, havi kantetira zgoa e'orino, <sup>9</sup>e'inara osuno ani' agu' agesare mani'nenno, Anumzamofonte hanave amentinti hu'neana, azeri hampo'na hino. <sup>10</sup>Ana eri'zana erigahazanki hu'nenka, esera avame antenka eri'za zamige'za knare hu'zama erisagenka, dikeni eri'zana zamige'za eriho.

<sup>11</sup>Ane zamimo'zanena anahu kna hu'za knare hu'za nemni'za, vahe zamefi'a ke osu'za, knare avu'ava hu'za fatgo zanke hakareza hanafina nehnage'za antahi zamigahaze. <sup>12</sup>Dikenima manisimo'a magoke a' anteno, mofavre naga'a knare huno kegva negrino, noma'afi zantmine, vahe enena kegva krigahie. <sup>13</sup>Ana dikeni eri'zama knare hu'za erisamo'za knare zamagi eneriza, eri'za zamifina otine'za, korera osu'za Krai Jisasintera hanaveti'za zamentinti hugahaze.

<sup>14</sup>Nagra ama avoma kre atrogeno kagritega viana, zaza kna omninesakena ko e'naku nehue. <sup>15</sup>Hianagi mago'a zamo'ma nazerinke'na omesugenka, nagrama avoma kre troana kagra kenka antahinka hu'nane, vahe'mo'za inankna hu'za Anumzamofono nagara zamagra kegva hugahaze, kasefa huno mni'nea Anumzamofono mono nonte'ma, atru re'nea anumza zafa, tamage kemofo agafa'e. <sup>16</sup>Maka vahe'mota mago trimpa nehune, Anumzamofono avu'avapi tamentintima hu'zamo'a eama nehie, ***Kraisi'a avufa erino eama higeno, Avamu'mo fatgo avu'ava eriamu higeno, ankeromozaga kageno, Kraisi agi agenke hakare kaziga huama higeno, miko mopane mopane vahe'mo'za zamentinti hzageno, tusi'a msa'nentake konariri'afi avreno mreri'ne.***

#### Havigema nehza vahe'mokizmi naneke

**4** <sup>1</sup>Hu'neanagi Ruotge Avamumo huama huno nerasmie, mago'a kna esnia knafina mago'amo'za zamentinti atre'za evunerami'za, rezmatagahu avamu'ene, hankro'mofono naneke rempi huzamisage'za zamagesa anteza antahigahaze. <sup>2</sup>Havige vahe'mo'za zamagra hu'za, amanahu vahe mani'none nehza vahe'mo'za havi kereti rezmatga nehu'za, knare zamagu zamagesa zamagu'afi me'neana, havi kereti zamagu'a kre hagege nehze. <sup>3</sup>Ana vahe'mo'za arave osugahaze nehu'za, mago'a kavera oneho hanazana, tamage ke'arema tamentinti nehutma nentahimota Anumzamoma tro hunte'nea zana muse hunenteta susu huta erigahaze. <sup>4</sup>Na'ankure hakare'zama Anumzamoma tro hunte'nea zamo'a, knare hu'negu mago'zana otreta tamagra susu hunentetma amne erigahaze. <sup>5</sup>Na'ankure Anumzamofono ke'mo' ene, nunamumo azeri agru hu'ne.

#### Timotima knare eri'za ne' manisia naneke

<sup>6</sup>Ama kema monopi mani'naza kafuhe'ima zamasmisunka, kagra Krai Jisasi knare eri'za ne' nemninka, hanavetinka hakare zupa

kamentintifine, mono kemofo nehunka, amage'ma nentampina hagegahane. <sup>7</sup>Hu'neanagi kagra maninka tvava'nemofo knihe kerera fra ovazio, hagi kagra knaka'ane, hanaveka'a Anumzamofu avu'avapi kzeri hanavetio. <sup>8</sup>Hanki amega tvufa azeri hanaveti hanuna zamo'a, osi'a knafi tza hu'zana eri gahunanagi, Anumza avu'avapi (godliness) maka'za hanuna zamo'a, huhampri'negu meni mani'zampina tza nehuno, henka mani'zampinena tza hugahie. <sup>9</sup>Ama nanekea tamage naneke me'negu antahi hanavetita erisnune. <sup>10</sup>Amana zante amuho huta eri'zana enerita mragu'za netune, na'ankure kasefa huno mani'nea Anumzamo'ma esnigu tagra tamentinti nehune, mika zamentinti nehza vahe zamahokehe nere. (Savior)

<sup>11</sup>Menima negasmua kea huankerenka huzamige'za amage anteho. <sup>12</sup>Atregeno mago vahe'mo'a nehza ne' mani'nane huno kagehenkamu otreho, hianagi zamentintima nehza nagatera avame zankna hunka keka'afine, kavu kvapine, zamesi zamante zane, kamentintifine, agru hu'zane, huzmeri hugahane. <sup>13</sup>Nagra egahuanki, hakare vahera zamazeri atru hunka avontafera hamprinka mono nanekea huama hunka rempi huzamio. <sup>14</sup>Kagra kagera oknitfa huo, Anumza naneke huama (profesi) hzagenka anampinti Avamu'mofo muse'za (gift) erinke'za, mono kva vahe'mo'za zamaza ante'za eri'za eriogu huhampri kante'naze. <sup>15</sup>Mika zupa kagra ama erizana kegva nehunka, anampinka eri'zana enerisankeno nena'a fore hanige'za vahe'mo'za kegahze. <sup>16</sup>Kagrama kavukvama nehanazana kegvanegrinka, rempima vahema hunezmina kenena kegva nehunka, maka zupa anazanke hunka nevanankeno'a, Anumzamo kagrira kagunevazino, keka'a antahinamokizmia zmagu'vazigahie.

### Kento a'nemofo naneke

**5** <sup>1</sup>Ranra vahekura rankea huontenka, negafanku'ma nehanaza hunka fru kefinti antahigo, hanki kahefa vahera negfuma huntenu nehanaza hunka azeri so'e nehunka, <sup>2</sup>ranra a'nea negrerama huntenu kna huntenu, kahefa a'nea, negasaroma huntenuknana hunka knare antahintahifi fatgo kazigati kva huzmanto.

<sup>3</sup>Mago kva krintega vahe'ma omni'nesia kento a'nea, kva krizamanteho. <sup>4</sup>Hu'neanagi mago kento a'ma mofavre'afi, negehoma maninesuno'a esera zamagra rempi hu'za mono'mo hu'nea kante nozamifi zamarera zamafaza kva krizmante'naza nona hu'za kva huzmanteho, Anumzamofona e'inahu zanku ave'nesie. <sup>5</sup>Ana hianagi agraku nemnesia kento a'mo, Anumzante amentinti nehuno hanine zgene nunamuna huno Anumzana antahigegahie. <sup>6</sup>Hu'neanagi mago kento a'mo agri'ma avonesia zankuke agha nentahimo'a, kahefa mani'neanagi avamupina ko fri'ne. <sup>7</sup>Vahe tmina ama naneke zamasmige'za avaririho, e'ina hananke'za mago'amo'za

ke huzmante kanku hakegahaze. <sup>8</sup>Hianagi mago'mo kora fatgo'a zamazeri so'e osuno, naga'a zamazeri so'e osnimo'a, amentintimo'a amne zankna hanigeno, zamentinti nosnaza vahera zamagtereno haviza hugahie.

<sup>9</sup>Hanki kento a'nea zamazama hunaku zamagima kresafina 60ti'a zge kafuma huno, nevente mani fatgo hu'nesia kento a' aza hugahaze. <sup>10</sup>Ana kentomo knare avu'ava nehiaza negesageno, mofavre zga'a negrino, aru vahe agampu nehuno, mono kva vahe zamaga sese nehuno, knafi mani'nesaza vahe zamaza nehuno, ana eri'zama'a arimpa amino knare huno erigahie. <sup>11</sup>Hu'neanagi kahefa kento a'nea zamaza hunaku zamagima kresafina onkreho, na'ankure zamesi'zamo zamazu hanige'za Kraisiimpi hanaveti'za nemniza'za atre'za ve erigahaze. <sup>12</sup>Ko'ma huvempa hu'naza kea anama hazazamo rufu'tagige'za, kea eri'za zamufafi eme nentaze. <sup>13</sup>Eri'za e'ori amne mani'neza, ru nOMPI ru nOMPI mrreritere nehu'za, nosuna naneke nehu'za, rumofo nanekere zamefiga'a ke hu'za vano nehu'za, osuga naneke nehaze. <sup>14</sup>Nagrama nagesa nentahuana, kahefa kento a'nemo'za ve eri'za mofavre nente'za, no zamia kegva nehnage'za, huhavi'za huzmanteku hanaza vahe'mo'za kegura hakregahaze. <sup>15</sup>Na'ankure mago'amo'za hago kana atre'za Sata nevririze. <sup>16</sup>Hagi mago amentinti nehnia a'mo naga'afi kento a'nema mani'nesazana, agra knare'za huno ana a'neramina zamaza hanigeno'a, mono vahera kna eri ozamisageno, zamagra'zmi zamaza huga osune'naza kento a'nea, mono vahe'mo'za zamaza hugahaze.

#### Elda kva vahe'mokizmi naneke

<sup>17</sup>Elda vahera, Anumzamofu eri'zante kvagri so'e nehza vahera, zamagi erisaga nehuta antegna huta zamiho (dabol ona), e'ima hanaveti'za mono ke nehu'za, rempima hunezmi'za vahera zamaza hugahaze. <sup>18</sup>E'i ana kante mono avo tafe'mo amanage hu'ne, ***Bulimakamo witi rga refuzafupeno anoma'a neharesigenka, zamagitera nofira ana'okiho.*** (Diu-Kas 25:4) Anazanke huno eri'zama erisia nona'a mizama'a erigahie. (Luk 10:7)

<sup>19</sup>Elda ne'ku rumo'za kna ami ke huntasaza kea ontahio, hianagi tagufa vahe'mo'o, tare vahe'mo'ma huramage hanigenka ana nanekea antahio. <sup>20</sup>Hanki kumi'ma nehza kva vahera, hakare vahe zamufi zamazeri fatgo nehuge'za, maka vahe'mo'za nege'za, kumi' huzankura kore hugahaze. <sup>21</sup>Anumzamofu avufine, Kraisi Jisasi avufine, huhampri zamante'nea ankeru vahe'zmufi kasamuanki, ama nanekea amage' antenka vahera refko osunka, mago zanke hunka zamesi zamanto. <sup>22</sup>Ame'ama hunka kzana mago vahetera antenka mono eri'za erisie hunka azeri o'otio. Mago'a vahe'mo'za kumi' hanafina kagra ana kumi'zampintira kagra manigru hunka manio.

<sup>23</sup>Tinkera onenka, osi'a waini tina nenegeni krimpamofona kza hino, na'ankure hakare zupa krima enerinkure.

<sup>24</sup>Mago'a vahe'mofo kumi'mo'a amate me'ne, kegaga hunte knare koteno vugahie. Hanki mago'amokizmi kumi'moa frakino me'neankino henka efore hugahie. <sup>25</sup>Anahu kante, hakare vahe'mokizmi knare zamuzmamo'a amate me'ne. E'ina higeno mago'a vahe'mofo knare zamuzmamo'a oku'a me'neankino, henka'a efore hugahie.

**Mono ke hanaza vahe'mo'za amage' ante'snaza naneke**

**6** <sup>1</sup>Hakare mono nentahi'za zgo e'ori kazokzo eri'za enerimo'za kva vahezmi'a razampi antahinezmisage'za, nege'za Anumzamofogagi'ane, tagrama knare kema nezmasmuna kea huhaviza osugahaze. <sup>2</sup>Iza'o amentintima nehnia ne'mo kva'a mani'nesigeno'a, kea ruha'ontagino, na'ankure zamagra neramafuze. Hianagi hakare zupa knare hu'za eriza'zmia eriho, na'ankure e'ima e'nerina eri'zana amentinti nehigeta tvesi'nentona kva ne'mo azahuzana erigahie. Ama'i naneke rempi hunezminka zamasmio.

<sup>3</sup>Hanki mago'a vahe'mo havige naneke nehniogeno, Ranti Jisas Kraisi nanekene, mago'zahu nosnigenka, e'inahu nanekemo'a knare Anumzamofogavua'ava enena trago'otene, <sup>4</sup>agra agu'agesa eri antemrenerino mago'zana antahi ama nosie, hianagi agra mago arimpa osu nanekere agenoka nehuno, nanekegu ke hakare nehigeno, e'i anampintira efore hiana rumofo zanku kesane nehuno, fra nevzino, rimpa oti'oti nehinkeno, vahe'ku huhaviza hunenteno, vahe antahi haviza hunenteno, <sup>5</sup>maka'zupa zamagu'amo knare osu'nea vahe ene fra nevziza, zamagu zamagesamo haviza hu'nea vahe'mo'za tamage kea nosaze. Zamagrama antahi'zana Anumzamofoganekefintira feno erisanti haregahune nehaze. <sup>6</sup>Ana hu'neanagi Anumzamofogavua'ava nehu'za agzone hu'za mani'snamo'za, knare zantfa erigahaze. <sup>7</sup>Ksema nerantageta ama mopafina mago'zana erita ome'none, hagi ama mopama atesuta mago'zana erita ovugahune. <sup>8</sup>Hagi ne'zantine kukenatima me'nenigeta, e'i ana zankura agzone huta nemnita muse hanune. <sup>9</sup>Ana hianagi feno vahe maniku hanaza vahe'mo'za, rezmatagafi evurami'za krifu aheaza hanageno, maka havi avua'vamofogamesi'zampi negi vahe kna nehu'za, zamazeri haviza huzante kezmasane hanageno, ana vahera zamahe haviza huno havi kampi zamareno uramigahie. <sup>10</sup>Zgogu avesi avesihu avua'vazamo'a maka havi avua'vazamofogagafa'e. Mago'a vahe'mo'za zgogu nehakre'za zamentinti atre'za afete nevzageno, zamasuzamo mani'za zamifina agonazamo kota zmahea kna nehie.

<sup>11</sup>Hu'neanagi havizampintira atrenka nefrenka, Anumzamofogavua'ava maninananki, fatgo zanke nehunka, Anumzamofogavua'ava nehunka, kmentinti nehunka, kvesi nezmantenka, hanavetinka nevunka fru hunka manio. <sup>12</sup>Kmentintimofogahara knare ha' nehunka, kagima higenka manivava asimuma eri'nanana azeri hanavetio, hakare vahe

zamufi kagra ko huama hu'nane. <sup>13</sup>Nagra Anumzamofu avufi negasmue, maka'zama asimu ami'nea ne'ene, Kraisi Jisasi tamage kema Pontias Pailoti avufima huama hu'negu, <sup>14</sup>kagra ana kasegea eri haviza osunka kva hu'negeno, tagri Rantimo Jisas Kraisi efore hino. <sup>15</sup>Agra knama ante'nere fatgo huno egahie, Agrake asomu'ane vugota hu'nea kva ne'ma (sovereign) kinimo'kizmi Kinie, ra'mokizmi Rane, <sup>16</sup>Agrake'za ofrino mani'vava hugahie, tusi'a msa'afi mani'neankiza vahe'mo'za urva'o osugahaze. Mago'mo'e huno onke'neanki'za onkegahaze. Agripi Ra agine, hanave'anena mevava hugahie. Tmage.

<sup>17</sup>Ama mopafi feno vahe mani'naza vahera huzamasmige'za, ana fenozantera zamufa ra osu'za, ana fenozantera zamentinti osiho, hianagi Anumzamofonte zamentinti hiho, Agrama maka'zama tmigeta eneruna'zanku huta muse hugahune. <sup>18</sup>Zamagrira huzamasmige'za knare'za nehu'za, knare eri'zamo feno zamigna hanige'za, upama hu'nesaza vahe zamaza hu'zanku nentahi'za, feno zamia retro hiho, <sup>19</sup>E'inama hanu'za, zamagra henka'a esnia knafima erisnaza zamofu agafa'a knare hu'za eri atru nehu'za, ana hu'za azerisaza zanteti tamage mani'zana erigahaze.

<sup>20</sup>Timotiga, Anumzamofu antahi kamino kmi'nea erizantera kvagri fatgo huo, avufa'a omne'nea nanekegu hafra hugante'nazana, kamefi hunezminka havigema hanaza vahera antahi'ozamio. <sup>21</sup>Ana nehu'za mago'amo'za zamentintia atre'za ru'are vu'naze. Anumzamofu asunku'zamo kagrane mesie.